

四庫全書

集部

欽定四庫全書

集部

五百家播芳大全文粹卷二上

詳校官編修臣謝振定

助教臣常循覆勘

總校官編修臣王燕緒

校對官中書臣范 整

謄錄監生臣張若湘

欽定四庫全書

五百家播芳大全文粹卷二上

宋 魏齊賢

葉 菜同輯

表

籍田

賀籍田表

趙德莊

農祥晨正調元氣於孟春十官景從乘時龍於千畝肇

新容典翕受純禧

中賀

竊以祈黍稷以勸耕共業盛而

致孝晚周殘缺禮不見者百年矣漢緝熙詔始行於三

世自時厥後曠代僅存職既失於向師論多淆於博士

若稽治古繫我太宗規古壤於朝陽標紀元於端拱通

追來孝載更累聖之傳講議洽聞允屬中興之運順導

東郊之令躬勤南面之尊出種稷於掖庭肅門閭於宮正

紺轅黛耜駐天步於青城華蓋金根旋日輪於黃道神

靈降格樂奏洽和迄成貴賤之班式懋耕耘之勸恭惟

皇帝陛下敦修大本蒐舉懿文斲揉教民世仰神農之  
聖饒賓分命人知堯舜之心於昭親率之誠益顯太平  
之盛臣拘縻外守阻望清光播穀惟時遐想載芟之什  
力田可舉願賡宣布之詩

賀籍田表

孟陬協紀方欽授於人時太史戒期爰躬耕於帝籍有  
嚴熙事茂輯純休中賀竊以天田九星象著耕耘之應  
農興三益禮為恭儉之先考周制以僅存求漢章而既

逸永平鼎盛徒賜食之有聞開元亟行始進儀之粗見  
洪惟皇祖丕闡祲容建崇禮之通門啟思文之秘宇作  
為元紀敷錫宥恩事皆集於大成謀遂貽於繼聖恭惟  
皇帝陛下勤勞稼穡損益古今鬱鬯實彛儼朱紘而祇  
袂洪縻在手撫縹輓以周旋既屈帝者之尊益明天下  
之本然茲懿典罕值中興號公之諫永世以貽譏憲宗  
之儀半途而弗舉光於往冊獨我泰辰臣銜命江湖馳  
神觀闕染盛醴酪仰宗廟之孝思黍稷稻粱助田疇之

慶賴

賀籍田表

青壇祗被儼萬乘以尊臨黛耜爰興舉三推而躬勸歡  
傳華旦風動綿區竊以籍乃借民周雅述載芟之訓冕  
而從事戴經垂秉耒之辭不惟敦龐純固於是乎成抑  
亦醴酪粢盛於此乎出考之往牒具有明文故孝武頒  
詔於東郊章帝親巡於懷縣豈止一時之稱美實為千  
古之流光挺上聖之中興修縉儀而肇舉凡居涵覆孰

不欣愉恭惟皇帝陛下大德時乘多能天縱盡挽雲間  
之河漢洗空天下之干戈南北交通書文混一肆念黎  
元之衆未知稼穡之艱爰擇元辰用勤終畝丕顯先農  
之祀於昭重穀之誠千耦其耘佇慶康功之即萬邦無  
斁永歌嗣歲之興某叨守偏方幸觀盛事書頌一札已  
聞天語之叮嚀麥秀兩歧願繼前賢之彷彿

恤刑

賀恤刑表

張全真



東錄御天屬聖神之在運對時育物均雨露以布慈繫  
畏景之方隆閔祥刑之未措上嬰宸慮渙發詔音邈及  
遠方一清幽圉中賀竊以泣辜流念見大禹之至仁扇  
暘軫懷仰周文之懿範欽惟前躅垂裕後王於皇本朝  
比跡振古恭惟皇帝陛下堯仁冒遠舜智燭幽欲躋羣  
物於太和不忍一夫之失所故雷號風令期四海於無  
刑玉律金科庶有生之難犯蠢茲未革尚干有司惟深  
惻於炎歊重自罹於囚繫或匪惟良之吏必興慘獄之

嗟特頒細札之丁寧痛諭守臣於欽恤臣敢不俯勤夙  
夜仰副哀矜播厥官僚謹茲訟獄職惟宣化躬佩服於  
訓詞國無寃民庶導迎於善氣

賀獄空表

趙承之

好生之心本天地之大德措刑之效乃帝王之極功茂  
實頻仍輿情踴躍中賀竊以盛德在火金石或至於焦  
流南風之薰黎庶相趨而悅懌夏日可畏也如此聖人  
於刑曰恤哉然而扇暍之勞既乖於博施泣辜之感徒

厚於責躬曾未若庚三伏以在辰獄一夫之無有古寥  
寥其鮮矣今數數而見之此蓋伏遇皇帝陛下外布湯  
寬中勤舜察欽若丹書之慎惻然赤子之憐既摩義以  
漸仁因遷善而遠罪克底勝殘之績屢彰首善之民臣  
方蔭雲天詎施涓勺茲用憑於帝力不犯有司雖無德  
於都人式歌且舞

賀上元獄空及不拾遺表

春元三五之朝民無犯法王畿衆人之所路莫拾遺凡

履地以戴天皆舞手而蹈足中賀竊以俗繁時而薄厚  
性因習以汙隆空圖歷年周成王乃能去殺遺金當道  
樂羊子其猶動心矧都邑方盛於遨遊而車馬相追於  
暮夜向隅或泣不樂將致於滿堂以閤而投所盼固多  
於明月而乃盡虛囚繫爭效寶珍臣庶式訛莫麗臯陶  
之罰懦頑相勉競慕伯夷之風昔所未聞今方創見此  
蓋伏遇皇帝陛下聖恩不冒神化旁流刑本期於無刑  
信未施而已信頑嚚感格庶恥興行既首善於京師將

純被於天下躋諸壽域登以春臺臣猥被闕員誤當劇  
任甫閱政條之頃仰蒙帝力之深何以鞭笞莫措趙張  
之術幸觀輦轂悉為堯舜之吐

賀獄空表

堯舜性仁民日遷善成康刑措史不絕書凡有耳目之  
見聞不勝手足之舞蹈中賀竊以中都浩穰在止辟以  
尤難長夏鬱蒸雖佚居而猶病無有一人之獄適丁千  
載之期恭惟皇帝陛下獨運離明躬行乾健如曰不辜

之殺寧失不經推吾所愛之人及其不愛曾旬月之未  
幾致囹圄之屢空逮於畿赤之間舉絕縲紲之繫符瑞  
數興於草木貨財恥拾於道塗歷春夏以滋多累百千  
而未已臣獲寬吏責仰冒天功得以駕鈍之姿坐承嘉  
美之化沈朱李於寒水共樂清時鞠茂草於園扉殊多  
暇日

賀寒食獄空表

千里之畿刑誅不用一月之內囹圄再空父老未省於

見聞中外相趨而鼓舞中賀竊以德可興於有恥法徒

禁於已然如曰得情固非曾子之勿喜與其聽訟未若

仲尼之使無況茲浩穰之區乃叶陽春之序昔無留獄正

然輦轂之燈今靡繫囚方禁閭閻之火當嬉游行樂之

際逢太平止辟之期實曠古所未嘗乃接踵而相繼此

蓋伏遇皇帝陛下以民為體其仁如天力推忠養之恩

坐成忠厚之化凡爰書之過誤多所平寬每中旨之丁

寧具形惻怛善良草偃姦慝覘消路得遺金獻寶復聞

於數四涂逢畫象相望何止於千年既懷不犯之心將致可封之俗臣幸承官乏獲覩聖功已日乃字考易辭而猶信期年而化驗史冊以何遲

賀獄空表

至德動天雨澤霄降深仁逮下囹圄畫空道本繫於聖神福乃歸於黎庶歡聲盈耳和氣塞朝中賀竊以四十年而無刑周昔盛矣千餘年而復古宋今繼之偶春序之愆陽軫帝居之旰食躬紓寶墨之妙救無庶獄之留



詔札未乾雲霓奔走綸言既布田野沛霑致輦轂以肅  
然無縲紲之繫者逮於甸服陶我皇風六邑陳狴犴之  
靈三縣落草木之瑞好義益興於鄴鄙拾遺爭効於貨  
財嘗舊史之傳聞迺此日而親見此蓋伏遇皇帝陛下  
順帝之則與天為徒以文王之小心急虞舜之先務雖  
奏讞之委曲未始忽忘至斷弊之錙銖類從末減民識  
知於惻怛俗愧恥於頑嚚故於憲章靡所抵冒臣猥尸  
官事莫措吏能鈎距無奇敢比蹤於廣漢桁楊不用幸

息謗於莊周

祥瑞

九鼎 元圭 玉璽 日有承戴 醴泉 甘露

河清 瑞禾 芝草 紅鹽 神降 祥光 雨雪

賀九鼎成表

張全真

王春啟節陽德布和粲仙掖以凝輝絢龍文而發彩惟  
彌海宇喜溢民心中賀竊以文鼎出於山川甘露零於  
草木而前王已為盛事儒臣載於信書以彰不世之珍

符以示無前之偉烈未見聖謨獨運寶器載成天鑒潛  
道殊祥薦降有如今日夙絕前聞恭惟皇帝陛下大明  
燭於萬方麗澤洽於四海嘉生繁植協氣薰蒸顯當天  
地之心密契神明之德故得九牧之金制器五色之瑞  
騰文神物護持豈止黃雲之下覆靈仙降格且瞻白鶴  
之來翔光播無窮允昭至治某邈居江介叨領郡章職  
在承流恭布十行之詔心存將美欣逢千載之期

賀元圭表

晁之道

恭臨路朝祇受大寶神祇並貺日月增明於是伏覩唐  
虞之隆蓋莫能窺天人之際中賀竊以羲皇而降典謨  
所傳稽德與功惟堯及禹既凝庶績用作元圭帝惟寵  
加后亦時保陋漢唐之制作迺伏不彰逮神聖之盛隆  
弗求自至因時展采揆古創儀考陽復之休辰膺天受  
之丕貺於昭盛典允屬昌時恭惟皇帝陛下徧覆仁天  
秉執慈寶黎民於變追放勲之文章六府孔修掩夏王  
之勤儉是錫神物以昭聖功揆厥本原孰與倫擬接千

歲之統且方比迹於三皇上萬年之觴又將均福於四海

賀元圭表

趙承之

盛德當天寶圭出地茂對陽來之吉丕承帝錫之嚴既跨周以越商遂踵堯而配禹中賀竊考載籍逖觀古初

厥惟符瑞之興必有精禋之感伏藏蔽慝在昔既遠矣光明發見而今乃赫然蓋右助於昌期示章明於景贖恭惟皇帝陛下九族既睦六府孔修海無遠而弗漸河

不約而自翕克臻茲祉用相厥成臣欣覩盛儀悵居絕  
塞冕而執玉想天表之顯印拱以向陽極葵心之踴躍

賀玉璽表

李成季

大明當宇百辟趨朝翼赭案以前登發金箱而跪進靈  
光煥耀虹氣屬天妙刻蜿蜒龍文照日作乾安之樂奉  
天子之觴誕布宥恩敬謝宗廟慶流海宇懽動人神實  
曠古所未聞宜四方之來賀中賀竊以明德在御嘉應  
並臻蓋天將有示於人故地亦不愛其寶至神變化非

意所知和氣薰蒸為時而出惟珍符之肇見錫景命以  
來崇眷懷本自於帝心追琢疑非其世造學者之辨無  
以稽諸史玉人之巧莫能喻其工不必論前世之所遺  
要非值聖人而不見恭惟皇帝陛下仁孝率考嚴恭事  
天朝廷治而庶官修陰陽和而五穀熟百神協相四海  
乂安宜保無疆之休以稱甚盛之德靈芝朱草非難致  
之物神鼎丹甌不足効之祥非假祕文孰昭休貺昔堯  
享封人之祝漢聞嵩岳之呼曾未若躬承受命之符永

為守國之器聖作明述方啟佑於千齡史書樂歌將有  
辭於萬世

賀日有承戴二氣表

趙承之

慶符昌運瑞靄祥氛有日觀瞻含生鼓舞

中賀恭惟皇

帝陛下密參覆燾妙極照臨正色而朝廷尊清心而天  
下治百辟無有內外罔不欽承四海至於要荒率皆欣  
戴故依賴而託喻示絕後以光前臣欣遇盛時悵拘極  
塞休嘉稠疊信禹智以難名文曜昭章若堯明之可就



賀太陽不虧表

趙承之

薄蝕之祥既形於推測銷復之應遽驗於回移蓋天意  
至於不違非聖人孰能與此恭惟皇帝陛下式是四國  
撫於五辰循軌之祉屢彰揚光之符昭假偶此經行之  
度適當交會之期惟德可以勝妖而日為之不食瑞超  
古昔喜動神人臣幸際休辰獲聞大慶莫展造庭之賀  
第深擊壤之情

賀太陽不虧表

葛侍郎

官占常度前知陽照之當虧德動蒼旻俄見蝕分之不  
既清臺襲吉薄海騰歡恭惟皇帝陛下道契乾元功參  
離照撫寢熾寢昌之運得寅賓寅餞之宜惟圉月適屆  
於正陽而靈曜乃侵於內壤聖躬修行天鑒儲休如月  
之初光尚全於半璧自天申祝福永固於丕圖

賀禁中出醴泉表

趙承之

盛德當天寶泉出地節彼名山之麓渙然靈液之滋瑞  
迹昭明歡聲震動中賀竊惟潤下之為德固善利而不

窮雖應物以逶迤若無難者然乘時而開塞如有待焉  
夫惟至明甚盛之辰乃獲自然非常之應方王師之具  
集偶輓汲之未豐人或望梅竊効崎嶇之智神方抉石  
自開甘美之源精禋之交著驗如此恭惟皇帝陛下博  
厚配地清明在躬極精意以禮百神竭孝思而奉清廟  
橋山祖考將謁款以薦誠王屋仙靈遽發祥而獻瑞蓋  
水性之咸得致泉源之自通仰觀聖躬灼見天意臣生  
逢盛際目覩竒祥法從相趨阻覲朝儀之盛殊廷在望

實霑帝澤之餘

賀甘露表

趙承之

盛德至矣燕及皇天零露漙兮震於珍物惟滋液滲漉  
之富當蠅蝓蝮獲之嚴祉福著明見聞踴躍中賀恭惟

皇帝陛下秉執乾妙經綸政機垂拱視朝既每勤於中  
昃宣和御殿不自逸於燕閒蓋雷聲淵默之所以神亦  
文經武緯之由此出備列學士侍從之職大集御府奇  
秘之書寫方丈於海中構廣寒於天上序協而璿璣察

氣和而玉燭調用感格於殊祥以發揮於嘉瑞初厭浥  
而非霧乍甘美以如飴厥壤可游豈必待木蘭而後飲  
維德其物固知非仙掌所能承精稔之交影響如此而  
臣幸因官列偶直殿廬獲拱舜瞳粗識天顏之喜當書  
堯典愧無史筆之長

賀河清表

后祇秩祀適陳母事之儀坎德開先時薦河清之瑞表  
非常之景貺昭至德之精通凡在見聞孰不欣忭恭惟

皇帝陛下誕揚基命欽率元謨得虞帝之執中體成湯  
之秉哲人文煥而允穆聖風行而普和名山既升集四  
靈而為畜萬物咸賴顧行葦而不傷恬淡宅中雍容垂  
拱天鑒丕德啟真錄以合符民戴上休奄神區而望幸  
講求茂實俯詢僉同增修鄧上之宮竚發襄城之駕威  
儀浸盛兼商輅以齊驅福應駢臻豈漢鼎而專美惟域  
中四大地得一以攸寧天生五材水潤下而為利稽九  
河之既道冠四瀆以稱尊抱睢壤以縈迴合汾源而奔

注舟師振楫幾汨於湮泥川后靜波俄澄於江練連銀  
漢而共色侔浪井以成文三門緩激箭之流百丈見織  
鱗之戲蕩邪却穢挹之無遜於甘泉薦潔明馨用之可  
資於玄酒實千年之慶會同萬世以延洪臣等將侍嚴  
祠獲觀丕應顧縉紳之士已拜於封章止旬浹之間又  
窺於列奏願示在庭之著位式昭希代之殊祥

賀瑞禾表

至德昭升奇祥顯見福禧稠疊遐邇懽呼中賀竊以天

地有自然之符木石蓋無情之物方瑞禾之出晉俄吉  
命之彰吳在寶訓可謂丁寧豈常理所能推測恭惟皇  
帝陛下恩被動植孝通神明力恢行葦之仁躬致騶虞  
之應克臻景貺用告丕平臣遠將邊屯阻趨禁闈竊覩  
殊尤之慶倍深踴躍之誠

賀芝草表

趙承之

睿澤旁通珍符並貺慶超今而冠古喜際華而接夷中  
賀竊以異畝產同穎之祥一年見三秀之祉自昔皆以



為上瑞於史罕得而屢書固未有合二美之殊尤種一  
氣而生發夫惟地不愛寶所以民無能名巍巍之功赫  
赫如此恭惟皇帝陛下天化地育雲行雨施道該形器  
之先治軼典墳之上故其效見每必瓌奇臣屬將邊屯  
阻窺禁闥夢想千官之集聲聞萬歲之呼

賀左藏生芝草表

趙承之

九功協序震於動植之珍三秀發祥茁彼貨財之府自  
天降福率土均歡中賀欽惟地產之饒積此國儲之富

轉輸雲委輪奐鼎新比增帑藏之區方差甲乙之次仰  
煩睿藻誕錫宸章祭奎壁之光輝護金帛之氣象仍亟  
頒於中旨俾大發於滯財予取予求浩錢流之滿地我  
任我輦爭捆載以歸家惠深決於輿情喜頓招於和氣  
默興地寶示允天心此蓋皇帝陛下用義理財以仁濟  
衆雖草木之微細每禁牛羊欲菽粟之均通皆如水火  
上帝識知其惻怛下民感激於愛憐故於出納之司獲  
此神明之貺煌煌其質炳炳厥符臣猥以庸虛謬當典

領襲六經為七願紀瑞於史官呼萬歲者三敢効誠於  
嵩岳

賀紅鹽表

趙承之

聖神受命冠古超今川瀆炳靈產祥降嘏蓋昭示於景  
鑠以大賚於羣生

中賀

伏以潤下作鹹實資惠養熬波

出素厥有由來詎聞皦爾之珍效此赫然之瑞蓋必有  
無前之績故能興不世之符此蓋皇帝陛下道企堪興  
政平水土獨奮至剛之斷力回既倒之瀾天無私而益

親地有寶其敢愛臣方乘邊障阻造闕庭貢篚當前想  
羹梅之驟美炎精協序驗火德以彌昌

賀王屋山天尊降表

盛德感通上真降格金簡玉札自古莫窺風馬雲車乃

今親觀

中賀

竊以先朝秘殿肇帝祖之躬臨近歲南郊

赫衆星之丕應蓋已和同而無間固宜陟降而弗違非  
聖孰能實天克享恭惟皇帝陛下力行慈寶深體道樞  
事帝極其肅祇震於神物保民達乎仁愛播為頌聲方

當定鼎於陪都載輯封巒之盛典仍即仙山之勝復瞻  
飈馭之游雖申錫於休祥可揆知於帝意臣久參從索  
遠守州符阻陪來賀之班第罄無疆之祝

賀明堂及萬歲山祥光表

汪彥章

帝宇聯華神光並煥方真人御極游陰陽造化之功故  
瑞祲浮空出日月照臨之上觀瞻莫測呼舞惟均

中賀

伏以周家開重屋之基黃帝起明庭之壤九筵五室蓋  
天人精禋之交萬壑千巖本仙聖游居之地暖即穹窿

之表肆呈紛郁之珍交縹緲之雲龍度駢闐之風馬雖  
境分南北相望丹禁之中然時厯昏昕皆協素秋之半  
茲蓋皇帝陛下夙夜基命清明在躬包兩儀於泰定之  
先飾萬福以昭回之象乃格層霄之應坐瞻羣燭之光  
恍若壺天金成宮闕浩如玉海虹貫山川矧藁街大獻  
之辰仍桂魄將圓之夜融融佳氣示鶴行瓌偉之觀肅  
肅靈氛生羽衛清虛之想亘古無有非今孰能臣等幸  
服適僚欣逢嘉貺屑然有見陋祠壇三燭之祥赫爾方

興明寶曆萬年之慶

賀雨表

王禹偁

自秋以來時雨不降遇災而懼至誠爰禱於上元有感  
則通甘澤忽霑於下土農登有望朝野同懽中賀伏惟  
皇帝陛下七政咸齊五行為質寅畏昊穹之命焦勞刑  
政之源一昨妖彗告災豐年失望宿麥播而未茁旱雲  
垂而不霑陛下靡愛斯牲徧走羣望降廷臣而決獄御  
便殿以錄囚御筆搃文乙夜引萬方之罪清詞瀝懇經

旬祈五福之宮惟德動天而天不違至誠感神而神受  
職向夕而月離於畢崇朝而雲上於天散絲徧洒於焦  
枯比屋重興於耒耜豈止小康之兆將書大有之年堯  
眉舒八彩之顰免貽臣辱舜樂復九成之韻大悅民心  
凡在含生同知大賚臣為霖寡術和鼎備員方期冊免  
之文以塞燮調之咎處台司而愈愧荷聖感以彌深

賀雪表

王禹偁

臘者四時之暮所以成歲功雪者五穀之精所以滋農



啟實上元之垂祐表聖主之憂民凡在昌期共欣嘉瑞

中賀

恭惟皇帝陛下勤勞庶政欽順天時因百姓以為

心思躋壽域慮一夫之不獲常若納隍而自秋徂冬密  
雲不雨陛下念兆民之稼穡憂七廟之榮盛徹金石於  
堯軒減葷醴於舜甑而又京師之內鰥寡之徒大頒金  
帛之資用拯飢寒之累靡神不舉有感則通遂令六出  
之祥大副三農之望連宵委積徧野霑濡彰聖德以彌  
昌書有年而無愧臣方居假告忽覩休祥雖慙調燮之

功但樂豐登之極

賀雪表

葛侍郎

同雲彌望布清灝以垂陰密雪應期協康年而呈瑞載  
塗流詠薄海騰歡恭惟皇帝陛下體御至神幹旋元化  
撫五辰而致順閱衆甫以咸宜致茲六出之祥來應一  
陽之候飛花剪水舞青女於縈空亘陌連阡貯黃雲之  
若接臣承休天陞庇職台司奉萬壽之觴虔祝延洪之  
算引七星之履敢言變理之功

賀雪表

呂伯恭

夔夔蠃蝓穆若清都之邃聯翩飛洒曷然豐樂之祥瓊  
琛宸居昭融休氣恭惟太上皇帝陛下默調玉燭高眠  
珍臺成性存存雖獨觀於虛白為衆父父未庸釋於黎  
黔顧圭璧之錯陳睠倉箱而載懌臣邈居下土絕竝寥  
天游藐姑之山既瞻冰雪占曾孫之稼豫慶茨梁臣無  
任

賀雪表

呂伯恭

皇極之主疇既叙於時寒豐年之冬兆先占於積雪續  
紛六幕責冒九圍恭惟皇帝陛下綏靖嘉師財成元化  
嚴凝西北斂義氣以方升疆理南東瞻同雲之已合瑞  
呈禹甸喜溢堯衢臣等幸際昌辰欣逢休應授簡而居  
客右雖慙梁苑之詞為樂而與民同請上齊宮之對臣  
無任

奏捷

賀講和表

岳少保

臣伏准敕書節文金人許割河南地歸本朝者觀時制  
變仰聖哲之宏規善勝不爭實帝王之妙算念此艱難  
之久姑從和好之宜睿澤誕敷輿情胥悅中賀竊以婁  
敬獻言於漢帝魏絳發策於晉公盟墨未乾軟血猶在  
俄驅南牧之馬遽興北伐之師蓋邊釁不常而詞輕寡  
信莫守金石之約難充谿壑之求圖暫安而解倒懸猶  
之可也欲長慮而尊中國豈其然乎伏惟皇帝陛下大  
德有容神武不殺體乾之健行巽之權務和衆以安民

乃講信而修睦已漸安於境土喜想見於威儀臣幸遇  
昌期獲親盛事身居將閫功無補於涓埃口誦詔書面  
有慚於軍旅尚作聰明而過慮徒懷猶豫以致疑謂無  
事而請和者謀卑詞而益備者進願定謀於全勝期收  
地於兩河唾手燕雲終欲復仇而報國誓心天地當令  
稽首以稱藩

賀安南班師表

曾文肅

臣某言伏覩廣南荆湖路安撫使司劄子已克伏交趾

了當班師者猶俗亂常敢干天討偏師問罪深入塞庭

戮其酋豪拓我疆土歡傾萬宇威懾四夷

中賀

竊以安

南一方輿地千里世受爵寵列為翰藩屬傳嗣之童昏

有擅權之奸慝遽為畔援自取滅亡迺申命於虎臣俾

肅將於師律運籌決勝受神算於廟堂折馘執俘獻凱

歌於宗社成雋功於不日邁振古以無前此蓋伏遇皇

帝陛下大智日躋沉機天縱赫然一怒舉必萬全詠采

芑之南征固無慚德勞出車之還率亟有膚公豈惟底

定於遐荒抑足震驚於戎幕

賀斬夔離不表

汪彥章

王旅徂征犁庭沙漠種酋就殪函首京師偉哉宗社之  
休永矣車書之一涓辰大獻罄宇交歡中賀臣伏以天

下為家既靡殊於疆界聖人去惡當務絕其本根惟北  
荒傳襲之區異中國衣冠之俗逢時休盛舉國震驚悲  
主恣臣來襲漢儀之舊實墉實壑率循周典之同蠢茲  
遺孽之妖敢肆怙終之惡介山溪而負衆盜名字以欺



天爰驅烏合之師力抗鷹揚之旅乃煩四校之出不遣  
隻輪之歸既首戮於鯨鯢仍悉除於蜂蠆征而不戰聊  
麾荆柄之幡梟以示懲永震葉街之邱恭惟皇帝陛下  
與天同大視古無前運五季以精神之餘玩四夷於股  
掌之上雖游魂之倔强難假息於須臾坐令醜類以寒  
心常若神兵之在部臣側聞盛事阻造外庭登喬岳以  
告功雖負史談之嘆斬郅支而豐鼓敢忘班固之銘

賀收祥州表

晁之道

盛德丕冒要荒畢徠地歸版圖人襲冠帶際天無外揆  
古有光臣某中賀竊以上主憂民願豈私於絕域百蠻  
從化或頗識於慕君蓋至仁不得獨遺宜聖世為之遠  
撫矜其誠懇錫以寵光肇新郡邑之名適契休祥之會  
是為天意豈獨人謀此蓋伏遇皇帝陛下經緯聖文卷  
舒神武四海從欲而既治九夷不詔而自來致此殊方  
列於支郡故封雖遠如瞻咫尺之威歡頌載新願上萬  
千之壽

賀安南捷奏表

曾文肅

威靈所被萬里收功凱捷布聞兆民賴慶

中賀

臣聞聖

人之於征伐也用非得已先王之於夷狄也威然後懷  
物萃聚而除戎時豐亨而致法蓋方飭治之既備故苟  
犯順而必誅虞帝所以事有苗之征宣王所以有淮夷  
之伐監此前載率於盛時恭惟皇帝陛下剛健體天休  
明超古萬方順以無侮三靈和而允懷魯爾交蠻干我  
天討跳齧肆於窮壘虔劉及於數州不示大刑曷懲下

軌軍聲震疊肅如金鼓之下天皇澤漸濡迫若雲霓之  
救旱俄熒然而請命因示之於好生惟盛德所以成無  
戰之征惟至神為能有不殺之武出車薄伐既奮蠻荆  
之威後後來蘇行紓北狄之怨海隅大定氛祲一清赫  
然盛勲若無前古

賀收復涿易二州表

汪彥章

聖謨獨運王旅徂征行列聖之逋誅弔百年之遺俗間  
闕內款疆籍來歸中賀臣聞黃帝得天始正版泉之伐

宣王復古爰興獫狁之師緬惟幽薊之區久失漢唐之  
舊厥留丕績以待聖時出成奠於九重斥提封之萬里  
風聲鶴唳何勞震疊之餘箠食壺漿惟恐歡迎之後茲  
蓋伏遇皇帝陛下功高治古道冒綿區無收夷夏之心  
克紹祖宗之志得皇天之所覆徠上古之不臣前茅深  
入於殊疆破竹遂無於遺策臣幸逢嘉會適守遐藩傳  
聞毳帶之朝悉陳渭上遙想龍墀之慶獨阻周南

賀瀘南班師表

小醜亂常敢憑陵於鼠穴偏師薄伐旋毀覆於梟巢捷  
書流聞戎漠震竦臣某中賀竊以獫狁孔棘十乘以之  
啟行蠻荆來威四方以之無侮維二川之南鄙有六詔  
之遺黎雖種類寢微莫能統一而封疆交備每肆寇攘  
大張我師深入其阻未悔觸藩之禍尚懷拒轍之姦武  
節載馳靈旗遙指伐山道道駭王旅之如飛折馘執俘  
信天聲之有赫既掃除於妖孽益恢扞於方隅邊障肅  
清里閭安枕此蓋伏遇皇帝陛下操德勇智玩心神明

端拱九重之中折衝萬里之外沉機罔測獨斷不回干  
戈省躬居無忘於遠略鈇鉞飾怒動必克於仇方矧絕  
塞之荒墟宜指期而殄滅臣叨備近職預聞吉音徒誦  
周雅采芑之詩莫陪漢庭奉觴之慶永言忭躍實倍等  
夷

賀聖駕還京表

王禹偁

臣某言今月十六日進表院狀報正月二十三日駕  
還京者犬戎逃遁鑾輅凱還中賀伏惟皇帝陛下奉承

祖宗威懷戎狄但懋守文之德靡矜神武之功最爾遐  
陬無名內侮蜂屯烏合鼠竊狗偷必想邊民奪挺以毆  
攘亭長持繩而繫縛豈勞車駕遠涉山川陛下念二聖  
臨朝每經營於河朔屬三時不害乃巡幸於沙場存問  
耆年勞來疆吏有征無戰陳詩觀風邊人識龍鳳之姿  
代馬避虎貔之衆昔周宣薄伐玁狁深入太原漢武斥  
逐匈奴遐臨瀚海頗為勞勩尚著聲名曾未若陛下仰  
順天時俯從人欲出狩適當於冬隙班師未發於農祥



端居紫宸飲至清廟穀雨方霈春華正繁捧觴長樂之  
宮錫宴上林之苑皇歡大洽天步永安易曰聖人以順  
動則刑罰清而民服孫子曰不戰而屈人之師善之善  
者也其是之謂乎臣方在謫官無由扈從既不草頡利  
可汗之露布又不答冒頓單于之謾書當文士有為之  
時處山川無用之地迎鑿莫遂望闕彌深無任歌時樂  
聖

賀西師捷奏表

汪彥章

整我偏師深入襟喉之地執其醜虜遂空巢穴之羣捷  
走星馳歡聲海溢中賀惟此犬羊之聚數搖蜂蠆之奸  
不思覆露之隆寬輒肆跳梁而旅拒如江如漢始知蹈  
犯之難我陵我阿頓獲并包之利斬馘千計沈機萬全  
茲蓋伏遇皇帝陛下睿算中潛神威遠愴坐制四夷之  
命靡煩六月之征不戰而屈人兵兼成破竹之勢有常  
以立武事遂奉采薇之詩臣等幸服邇僚親逢殊慶兩  
階舞羽曾莫贊於苗征萬壽稱觴顧敢忘於虎拜

--	--	--	--	--	--	--	--

1  
2  
3  
4  
5  
6  
7  
8  
9  
10  
11  
12  
13  
14  
15  
16  
17  
18  
19  
20  
21  
22  
23  
24  
25  
26  
27  
28  
29  
30  
31  
32  
33  
34  
35  
36  
37  
38  
39  
40  
41  
42  
43  
44  
45  
46  
47  
48  
49  
50  
51  
52  
53  
54  
55  
56  
57  
58  
59  
60  
61  
62  
63  
64  
65  
66  
67  
68  
69  
70  
71  
72  
73  
74  
75  
76  
77  
78  
79  
80  
81  
82  
83  
84  
85  
86  
87  
88  
89  
90  
91  
92  
93  
94  
95  
96  
97  
98  
99  
100

欽定四庫全書

五百家播芳大全文粹卷二上

五百家播芳大全文粹卷二上

欽定四庫全書

五百家播芳大全文粹卷二中

宋 魏齊賢

葉 棻同輯

賀牋

皇太后

賀壽聖太上皇后冊尊號牋 趙德莊

肇新緝典欽薦鴻名仰符宸極之尊增厚坤元之載禮

成中禁歡動寰區中賀蓋聞以天下養者務極於推崇  
使聖人壽者爰深於愛戴天心所命人欲必從恭惟壽  
聖太上皇后殿下維德是行以慈為寶有開文定寶占  
渭水之祥尚友西真方侍瑤池之御揚洪輝於玉檢效  
靈瑞於龜圖流周召儉勤之風介黃老清靜之福永同  
臨照燕及雲來某久被明恩親逢殊慶莫踵及庭之賀  
徒傾方嶽之呼

賀壽聖皇太后尊號牋

許仲啟

聖膺曼壽知太極之有初實著徽名眎東朝而申舊兩  
宮致孝萬事均歡中賀恭惟壽聖皇太后殿下慈寶魚  
三福疇用九當燕謀之益廣宜鴻號之載熙文子文孫  
偕飭問安之警蹕亘今亘古誕敷歸美之形容臣乘障  
攸拘班庭是阻考漢家之長信未足同時誦周室之思  
齊茲誠並美

賀太上皇后加備德尊號牋

沈清臣

大慶欣逢仰乾坤之覆疇鴻名來上增日月之光明喜

動慈闈歡騰率土中賀恭惟尊號太上皇后殿下久勤  
內助光贊中興壽莫可量觀蕃衍昌熾之嗣德無不備  
兼聖明慈愛之休載極形容於昭懿鑠臣敬同我衆歸  
美吾君奉太皇后而悅愉允合昌黎之頌為天子父而  
尊養克行鄒益之詞

皇帝登極賀壽聖皇太后牋

許仲啟

思齊文母密協遠猷佑啟神孫光膺內禪慶臻家國喜  
徧華夷中賀恭惟皇太后殿下一德至慈三朝備福素



軫含飴之念贊成輯瑞之儀原揖遜之有初重規疊矩  
處崇高之無極億載萬年臣假守遐陬阻趨近綴共知  
養志調四海之旨甘更想問安聽兩宮之警蹕

皇帝登極賀壽成皇后牋

許仲啟

承天之亨施生攸賴與子之斷翊贊實勤慶輯家邦歡  
均遐邇

中賀

恭惟壽成皇后殿下動參乾極厚體坤元

作合而定厥祥昔著和平之美執中而修可願今昭保  
毓之慈軼長樂之徽稱儷重華之大養臣屬居乘障莫

蓬班庭仰婦道母儀有助唐虞之禮想王孫公姓不忘  
周召之風

冊皇后賀壽聖皇太后牋

燕處蕊宮致孫謀之永錫鳳儀椒掖謹婦道之再傳

中

賀恭惟壽聖皇太后殿下聖本自然壽先太極比姜任  
而致福撫舜禹以稱慈化基自有於本原豈徒一日壺  
範亦同於授受持表三朝臣假守列城阻趨魏闕王母  
之坐少廣共仰尊尊太妣之嗣徽音是為繼繼

冊皇后賀壽成皇后牋

仰作孚於渙號正此化基俾效法於坤元授之慈範中  
賀恭惟壽成皇后殿下處心柔順宅志沖虛昔警戒以  
相成今康寧而曰壽表儀有道尤高媯水之風付託得  
人遂陟塗山之助臣遠乘一障阻叩九關繭觀春和想  
示親蠶之訓翟車曉霽更形問寢之儀

慈福宮上尊號賀壽成皇后牋

聯南極之輝養茲為大仍東朝之號孝必有原中賀恭

惟壽成皇后殿下柔順體坤淵沖宅道俯贊基圖之授  
仰偕溫清之承得其壽得其名靡聞專嚮達於禮達於  
樂式著至和臣獲與承流敢稽進牘媯汭之嬪虞舜尚  
藉閭儀寶慈之侍太皇諒傳家法

重華宮上尊號賀壽聖皇太后牋

坐少廣以迎年既由積厚協重華而建號亦出至慈中  
賀恭惟壽聖皇太后殿下夢日義明補天勲大鴻寶昔  
聞於與子燕謀今見於詒孫仰稽揖遜之傳蓋推愛育

倘卽形容之義厥有本原臣獲與分符敢忘進牘為衆  
父父知尚謹於問安終日乾乾諒不違於養志

重華宮上尊號賀壽成皇后牋

夙昭慈範贊揖遜於一時並上徽稱迎延洪於億載慶  
兼家國喜溢華夷

中賀

恭惟壽成皇后殿下德合大明

道偕太極克盡嬪虞之懿助成昇如之高定位取諸乾  
坤為而不恃貴名起如日月傳之無窮臣假守遠邦阻  
趨近綴二南蓋久更形風動之辭十亂已卑空誦才難

之訓

慶上皇壽賀太上皇后牋

沈清臣

久日月之照並膺難老之期永邦家之休載講家人之  
禮式逢歲旦共行者齡恭惟太上皇后殿下輔佐深仁  
備全至德松椿兩固植國榦之隆昌箕翼齊明炳乾圖  
之煥耀有美玉卮之對相輝寶牒之光臣敢同普率之  
心彌切歡呼之慶華封稽首壽請祝於聖人義易垂辭  
福受茲於王母

賀皇太后生辰牋

李成季

候屬西成屆金方之正氣時生上聖配天德之鴻休聲

文所臨舞蹈同底

中賀

恭惟太皇太后殿下母儀恭肅

坤德靜柔弼成永圖休有顯烈三光明而四時節九功

叙而百度熙恢基業於無垠躋民物於交泰文武之興

周道華胥之贊軒圖迪是芳風負超治古臣守職藩佐

叨榮聖時觴獻萬年莫預造庭之列心肩一節徒傾就

日之誠宜益介於延洪庶克符於頌祝

賀皇太后生辰牋

代

秦少游

考厯占星氣應元英之候稱觴獻壽禮行長樂之宮凡  
在照臨所同欣抃中賀恭惟皇太后殿下德符坤載位  
正母儀淵沖自乎生知慈惠本乎天縱弼成文考既隆  
逮下之風共養太姜益著思齊之美內宣陰化日嗣徽  
音矧當孝治之朝尤崇慶誕之節鼓鐘具舉環珮畢臻  
歡聲動乎宮闈佳氣播於觀闕某謬通屬藉叨守近藩  
匪惟宗族之同榮實與吏民而共慶



賀太皇太后受冊牋

李成季

誕膺寶冊同攬乾綱號越常尊禮隆無上孝慈交感遐  
邇祇歡中賀恭惟太皇太后殿下柔順在躬聰明齊聖  
輔佐英帝肅陰教於六宮保鞠先朝端母儀於萬國載  
加盛典允荅徽音挾日以升均照臨於南面與天同久  
擁康樂於西朝臣限守藩符不獲趨詣闕庭

賀皇太后受冊牋

李成季

允膺寶冊增奉鴻名大孝隆親事光墳史萬邦蒙福喜

極人神中賀恭惟皇太后殿下育粹坤元服勤陰教輔  
佐先帝志在靜柔保鞠聖躬德惟均一式彰懿範推講  
盛儀祇答懿慈盡明王之要道誕敷徽命鼓百姓之歡  
心臣限守藩符不獲躬詣闕庭

賀太皇太后受冊牋

曾文肅

膺冊慶辰正位太母七廟增重三靈協和中賀恭惟太

皇太后殿下仁聖自天肅雍迪哲抱坤元之厚德倡陰  
教於中闈恭儉表儀外形於四海勤勞勲業光被於三

朝席高顯之徽稱極尊親之大奉比周文母世賴於徽  
音如唐懿文禮隆於祖后光輝大典協永寶圖人神蒙  
休海宇均慶

賀皇太后受冊牋

晁无咎

位著徽稱居天下母儀之貴禮嚴備物昭聖人子道之  
成宮闈載祇海縣胥慶中賀恭惟皇太后殿下懿恭性  
得慈儉身先坤極正於內朝陰教行於四國用膺光命  
允荅常尊漢典具修式虔長樂之養周詩足繼大顯思

齊之功臣伏限職事在外不獲躬詣闕庭

賀皇太后受冊牋

秦少游

稽酌天人備嚴典禮孝治既先於宮闈歡心自得於寰

區

中賀

恭惟皇太后殿下妙道生知英能天縱自長門

而登長樂法度無違以太任而事太姜晨昏不懈至於  
弼成先帝之治保佑聖子之功幽通神明顯被動植施  
之大者報必厚實之富者名必隆位號既昭華夷增抃  
臣謬道屬籍叨假郡章不獲隨列稱慶闕庭

皇后

皇帝登極賀皇后牋

許仲啟

剛德初潛實勤輔佐靈辰內禪宜最寵光家國愈尊華

夷胥慶

中賀

恭惟皇后殿下賢昭彤史眷綸青闈早膺

燕祀之嘉祥適值龍飛之盛際履長秋而建號載仰母  
儀頤重慶以承顏永修婦順臣遠叨郡寄阻造朝班流  
化自岐顛孰分於周召嗣音如如想莫間於姜任

慈福宮上尊號賀皇后牋

許仲啟

輔佐由初位正長秋之建名稱從昔禮嚴重慶之加

中

賀恭惟皇后殿下月遡日明坤承乾健際此龍飛之盛  
奉茲鴻號之尊玉振金聲敬致自然之表天長地久永  
依太極之光臣尚假守符遠修賀牘仰承三殿相殫侍  
膳之勤俯率六宮幸繼親蠶之舉

重華宮上尊號賀皇后牋

許仲啟

奉尊親之號允屬聖能佐孝敬之誠端由婦順

中賀恭

惟皇后殿下性鍾博厚運偶明昌穆如內治之和贊此

外心之博體乾坤而合德大養必借顯父母以揚名徽  
音是嗣臣邈居乘障阻造班庭寶刻昭垂想萬年之  
歸美禕衣盡飾同五日之間安

加太上皇太上皇后尊號賀皇后牋

沈清臣

禮舉外朝政闕內治贊一人之愛敬揚萬世之嘉休恭  
惟皇后殿下教表人倫化行婦道得名得壽既慶集於  
親聞事舅事姑諒喜同於坤極臣濫居帥守恭觀詔宣

仰太妣之嗣音載光雅頌贊重華之協帝歸美君王

賀皇后受冊牋

許仲啟

輔佐諸闈功嘗參於匕鬯表儀內闈位初正於禕榆式  
舞且歌自家刑國中賀恭惟皇后殿下本之恭儉濟以  
憂勤選由仙李之華慶屬猗蘭之秀仰膺圖於上聖爰  
受冊於靈辰治首六宮既明章於婦順德孚百姓致於  
變於時雍臣祇奉教條阻趨班列弟觀肅肅賢人罔間  
於免置尚想振振公子盡如於麟趾



賀皇后受冊牋

中闡正號佑天德之大明四海蒙休慶國風之有本禮  
嚴宮掖歡浹海隅恭惟皇后殿下以上主之資履重熙  
之祚至仁冒乎天地濬哲嗣乎祖宗謂聖人之功重乎  
治內而天下之定始於正家詔典冊於有司進坤儀之  
徽號仰恭廟祀上厚人倫

賀皇后受冊牋

蔡君謨

儷尊皇極宅正位於天閨配德紫宸膺鴻名於寶冊海

內臣妾舞蹈以之

中賀

臣聞文命造邦塗山所以宣內

助重華嗣聖皇英所以輔至明宗廟歆其薦羞穹壤因  
而垂祉載光懿範永屬熙朝恭惟皇后殿下纘服睿圖  
席休寶緒兩儀均大含生荷亭育之恩二曜高臨品物  
仰照臨之惠是以淑譽流於區域陰教序於宮闈用贊  
皇猷必崇位號加麗禕衣之貴增光彤管之華臣忝寄  
藩方阻遙天陛

皇太妃

賀皇太妃受冊牋

晁无咎

冊嚴異數位著徽名光舊典於古今溢歡心於內外中

賀恭惟皇太妃殿下令儀身率淑德性成輔佐先朝憂

勤內寢屬大明之繼體孝治增隆飭備禮於有司尊稱  
允荅

賀皇太妃受冊牋

李成季

誕膺徽冊增奉隆名凡在邇遐孰不抃蹈中賀恭惟皇

太妃殿下慶傳貴緒瑞發靈源率嬪御以靜柔奉蘋繁

而蠲潔屬真人之績紹推盛典以褒崇歡動宮闈事光  
史冊臣限拘藩守阻造闕庭臣無任

賀皇太妃受冊牋

秦少游

史官揆日宗伯陳儀舉令典於宮闈溢歡聲於方夏

中

賀恭惟皇太妃殿下挺生淑質休應昌期贊陰化於椒  
塗嗣徽音於彤管晨昏共養之禮簡在兩宮動靜謙率  
之風形於六寢在先朝則有警戒相成之道於聖主則  
有助勞罔極之恩中外所瞻情文宜稱肆被冊書之美

爰昭位號之隆臣猥被爪牙叨居藩屏不獲隨列稱慶  
闕庭

皇太子

加太上皇尊號賀皇太子牋

沈清臣

重規疊矩等天地以無疆寶冊鴻名覩朝廷之再舉事  
闕宗祉喜溢宮庭恭惟皇太子殿下貳體統乾承休太  
極參隨法駕之後敬上慈闈之稱祖烈用光儲儀有慶  
臣恭聞盛事忭極懦衷始於家邦既仰愛親之至施於

孫子自然帝祉之貽

慶太上皇壽賀皇太子牋

正月之吉始和式逢舜旦四海之內咸仰共慶堯年喜  
侍龍樓歡連鶴禁恭惟皇太子殿下德輝玉裕福萃金  
枝喬嶽萬尋近接瑤山之秀銀河千丈直滋少海之長  
行瓜瓞之繇繇等乾坤之蕩蕩臣阻趨雞戟屬綰麟符  
南極星明永赫在前之照蓬壺日永共瞻明兩之光

賀皇太子受冊牋

晁之道

備膺典冊肇建儲闈國本既隆海隅共慶恭惟皇太子  
殿下淵懿中積溫文外彰仁孝稟於生知藝林格乎天  
縱蹈三善之美既曲盡於承顏並重離之光宜歸崇於  
主鬯神祇悅豫廟社尊安某外守州麾阻陪班賀仰皇  
猷之增煥揆弱植以知榮

賀皇太子受冊牋

代

汪彥章

伏審仰法前星肇開儲禁慶闕宗社禮絕臣鄰恭惟皇  
太子殿下胄出神明生知忠孝夙凜刑家之訓居無在

傳之勤震一索而得男早膺眷命月三日而成魄難徇  
撝謙兼隆監撫之名進極褒嘉之數載錫彫珉之冊爰  
頒青輅之旂某幸託宗暉欽承友順盛典方昭於宮壺  
歡誠敢後於簪纓

賀皇太子受冊牋

顯膺寶冊升位儲宮臨軒行曠古之儀見廟示承祧之  
重恭惟皇太子殿下分輝寶緒毓粹璿源挺天人岐嶷  
之姿稟神聖徇齊之教當周室本支之盛獨冠百男宜



漢家羽翼之成無煩四皓前星外炳潄震中潛某幸列  
宗支喜隆邦本河潤九里方率族以依仁月有重輪願  
登歌而薦祉

賀皇太子受冊牋

代

發冊於中升儲以嫡遂正少陽之位永符太極之尊恭  
惟皇太子殿下稟德星暉凝姿玉裕鍾朱芾宜家之慶  
膺青宮主器之祥左右前後皆正人既懋分坊之選干  
戈羽籥在東序行觀齒冑之儀某幸出聖時親逢邦慶

喜人倫之既正符天下之至公頌詠無窮敷宣罔既

賀皇太子受冊牋

孚號揚庭元良貳極明父子君臣之懿協神祇宗社之  
休恭惟皇太子殿下信厚發中寅恭承上得賢哲少成  
之性符邦家長發之祥方四履以提封遂三加而冠胙  
歌詠重暉之日尤合天心旂登一角之螭仍昭聖祚某  
久叅肺腑同奉威顏傳聞徽冊之頒倍百外朝之慶

起居表

北郊青城起居表

代皇子

汪彥章

輿衛天行親講享祇之禮臣工宿戒交修扈聖之儀當  
解愠之清和宜儲精之晬穆恭惟皇帝陛下接千歲之  
統合三神之歡膺多福以履至尊舉祲威而明德意肇  
修陰祭裒對神靈千廬星列於壇場萬騎雲屯於次舍  
協氣旁達祥光上浮臣方習幼儀莫陪顯相嘉與函生  
之類共憑持載之安遙企威尊惟深慶忭

北郊青城起居表

函鍾八變將修大祭之儀陸戰百重密警周廬之衛舉  
典容而創見殫誠物以駿奔恭惟皇帝陛下道與時升  
禮由義起謂一郊二祭之合非三代六經之傳弗謂屬  
車之勞躬臨方澤之祀壇垓在望籩豆告陳蠶獲深思  
豐融來應臣屬當齟齬莫侍冤旒徒瞻晬穆之光無補  
肅雍之相

車駕親征起居表

趙德莊

靈旗杓指誕揚北伐之威戎輅天臨式慰中原之望儼

百神而受職拱方岳以來朝恭惟皇帝陛下淵嘿坐謀  
乾綱立斷神武不殺初何意於勇功天罰恭行實有開  
於駿命敵為不道古所未聞久敷德以示懷終阻兵而  
棄信詔聲厥罪人奮其忠方三捷以系傳宜一征而底  
定舉上郡元封之役親屈帝尊踵澶淵景德之行用光  
祖武清塵所扇時雨自霑臣猥假藩符阻陪羈勒仰民  
獻十夫之翼雖媿壯圖晞太平一士之功猶知謹守

車駕親征起居表

汪彥章

萬族戒嚴六蜚巡狩法成周之時邁張大漢之天聲恭  
惟皇帝陛下誠貫神明資兼勇智合羣英之策慮興中  
否之基圖念問安猶隔於雞鳴豈撥亂得辭於馬上姑  
從簡約用始憂勤臣甫遠闕庭莫共牧圉神戈所指方  
令裴度以眎師清蹕之行將獲呂嘉而名縣

車駕回鑾起居表

趙德莊

皇威烜赫方望幸於中原聖孝寅恭暫歸誠於清廟民  
有雲霓之慶師無霜露之勞恭惟皇帝陛下開濟艱難

圖維久大尚勤寶儉來天佑於清躬惡殺好生養國祚  
之元氣昌期將啟勅敵自平時乘六龍淮海風動日闢  
百里豪傑景從適茲祀以言還因薦勲而飲至格於藝  
祖聊收虞狩之常作我上京終復漢家之舊臣義均國  
體喜若己功簪素坐踈雖愧甘泉之從衣冠未挂猶瞻  
清渭之朝

車駕巡幸起居表

方仁和

六師雲陳共圖敵愾之忠萬乘天臨親示撫循之旨王

靈敷暢士氣歡騰中賀恭惟皇帝陛下孝本親親功超  
將將思父兄之播越軫吏士之勤勞露沐風纏共濟艱  
難之業雷驅電掃訖收嘉靖之勲臣叨守藩符但叅羈  
勒四方來賀願陳下武之詩二聖重歡佇勒中興之頌  
臣無任

車駕巡幸起居太上皇表

汪彥章

素秋既杪人欣萬寶之成滄海方澄地接三山之邃恭  
惟太上皇帝陛下獨觀昭曠高蹈希夷凝宇定之天光



藏雷聲於淵嘿玩味瓊笈逍遙蕊宮神靜身修既得廣  
成之道年豐粟熟益知姑射之神臣等夙侍清光叨陪  
大政莫執問塗之役唯瞻寧極之尊

車駕巡幸起居太上皇表

年運而往天時俄及於凜秋日舒以長物外方觀於浩  
劫恭惟太上皇帝陛下研幾繫表探頤寰中既與夫造  
物者游孰肯以天下為事遺玄珠於赤水久矣相忘飲  
膏露於金莖自然難老臣等幸參法從嘗侍清光徒傾

就日之誠莫遂瞻天之意

陳請表

請車駕東封表

趙承之

雲霄高遠未獲感通螻蟻賤微尚懷悃愫固避再三之  
瀆冀申萬一之情中賀臣等竊以天至尊而不可違民  
甚愚而不可抑王者之德既當於天意聖人之澤又協  
於民心和氣發於休祥歡聲播乎嘉頌福固難於專饗  
誼必思於有尊蓋欲歸功於皇天所以從事於喬嶽文皆

經見學亦世傳故孔子著堯望之儀以紀唐虞之常道  
而王通昧封禪之理乃謂秦漢之侈心方當黜異說以  
崇大猷莫若修盛典而示德意恭惟皇帝陛下堯仁舜  
孝文德武功論極前王之所未嘗政皆近古之所不到  
有四海之面內無一夫之向隅意所欲而動必成心無  
求而福自至昭然顧諟之命煥乎錫予之符超河圖而  
軼洛書昔皆無有發石室而探金匱史不能名治固莫  
盛於此時神亦有望於今日所以兆人脗合百辟僉同爭

獻長卿之文願上倪寬之壽以為接千歲之統安可絜  
三神之歡紛然陳義之高殆若後予之怨雖聖懷謙損  
方且深閔於俞音而靈貺昭明無乃久稽於眷命伏願  
皇帝陛下改容有穆出詔惟溫不憚陟嶽之勞每重省  
方之遠揭虔燔燎報施堪輿東方會諸侯之朝南面受  
羣臣之賀屬車八十一乘獲望清塵祥符一百七年再  
觀盛事民所願也天豈違之臣等咸以非才並當屬部採  
忱詞於多士察衆志於編氓與其坐壅塞以貽譏不若

緣冒煩而得罪神堪致薦雖自愧於蘋蘩日倘回光庶  
幾同於葵藿

請車駕東封表

趙承之

帝德昭明功既成而必告天心惻怛民所欲以斯從敢  
傾有衆之情願達蓋高之聽目瞻雲日足蹈冰淵

中賀

臣等竊伏里閭究觀載籍禮盛者其文必縟施豐者其  
報必崇故王者謹於事天而聖人乃能饗帝時薦犧牲  
之潔歲陳珪幣之嚴至於膺不世之殊休則必舉非常

之茂典推因高之義而即介丘之遠竭報本之志而躬  
夙駕之勞蓋稀闕之上儀實太平之盛節然相望者萬  
有千歲而可紀者七十二君道不虛行時若有待恭惟  
皇帝陛下體堯蹈舜跨商越周躬膺歷數之歸天縱聖  
人之略一心紹述孝弟通於神明萬物阜安忠厚及乎  
草木兵與刑而不試禮暨樂以咸興戎狄奉贄以守藩  
夷貊絜國而請吏農有常豐之歲士無不養之才故得  
人和而天瑞臻神貺而地寶出圖書炳煥象類昭明極

算數而無以該罄竹帛而不能紀茂惟天意具迪民衷  
鋪觀赫赫之祥灼見諄諄之旨所以西踰邾鄆東越龜  
蒙周人既願於升中魯國猶深於望幸眷此商韋之舊  
素聯畿邑之尊日月曬光最先瞻覩雨露流潤罔不函  
蒙惟祥符檢玉之年實真祖駐蹕之地屬車再至黃屋  
少留精舍有嚴尚錫雲封之號修途不改猶遵輦路之  
餘臣等所以爭倒衣裳競傾葵藿稚子不知其舞蹈耆  
年願濟於須臾冀聞謁款之音舉獲後來之慶伏願皇

帝陛下仰承帝謂俯詢輿言崇祕祀之闕規抑撝謙之  
高行涓辰誕告先日戒期命掌故以修方詔秩宗而考  
禮稽特巡於虞典則先至者岱紹祖武於章聖則用事  
者東渙百執以駿奔儼六飛而順動登封降禪並交天  
地之歡發政施仁咸錫臣民之幸臣等冀緣清道獲望  
咫尺倘鳴鑿之暫從故填壑之無憾正憐此日方馳海上  
之思猶喜異時無復周南之嘆

請車駕西祀表

邵澤民



天意溥臨人心應協願講親祀之禮式昭報本之規輒  
露封章仰干宸聽中賀臣聞自古在昔若聖與仁因地  
因天以祭以祀蓋乾坤之合德宜父母之並尊惟彼柔  
祇實專厚載修祠漢室卜宅魏雕出鼎騰光允矣后皇  
之靈迹泛舟鼓櫂偉哉孝武之勝游我國家臻至治於  
祥符闡鴻徽於章聖遠紆法駕躬奠黃琮玉匱金繩禮  
全掌故重輪紫氣事載信書間有遺民能言往躅顧長  
春之舊境乃馳道之通衢梵宇深嚴永留玉座飛橋連

屬常錫重名念此彌文且成曠典理若有待遭之甚難  
恭惟皇帝陛下當制禮作樂之時撫重熙累洽之運天  
臨海宇子育黎元成功不居修報有自是以兼隆二至  
之祀遠追三代之英感通幽明昭格上下神降祇出未  
之前聞瑞應祥臻其可勝紀伏願皇帝陛下既封嵩岱  
即款河汾歲事靈壇侑饗烈祖盡潔蠲之孝享罄明察  
之誠心然後錫福萬民垂休永世面方岳以朝羣后覽  
道俗而問百年駐輦蒲津光動倚天之樓觀回鑾函谷

雄觀亘地之山河臣逖遠闕庭叨分符竹俯彈悃愾深  
翼允俞望屬車之清塵敢効前驅而首路見甘泉之法  
從庶幾願畢於此生

請車駕幸洛表

趙承之

天地之德螻蟻莫不願忠鑾輅所臨臣民以為至幸情  
甚衆以難抑聽雖高其必從敢冒昧以譴訶冀露陳於  
悃愾竊以成周舊宅不改山川有宋別都具嚴筦籥土  
最中於諸夏日尤近於長安當開寶立極之初六飛天

降迨景德承平之後萬乘雲從草木尚被於休光父老  
猶談於盛事禮曠焉其斯久民望之而甚勤修厥舊章  
宜在茲日恭惟皇帝陛下盡循堯道丕顯文謨遠追三代  
之純躬軼百王之盛治無細而不舉功有難而必成薄  
四海無障候之虞環九州皆冠帶之域載惟立愛尤切  
奉先南面而朝感春秋霜露之降西風所暨念祖考弓  
劍之藏既出綍以戒期將涓辰而展事陵園動色如喜  
翠華之來京邑相趨咸願屬車之覩而況闕宮肅設儼

列聖之晬容禁宇崇成煥中天之寶構宜暫勤於乃顧  
庶深慰於斯民伏願皇帝陛下俯照忱辭仰開睿聽既  
竭孝思之奉特迂輦路之臨勤西后以省方御山川而  
問俗靈河達砥柱之險遠懷有夏之功溫洛通汴水之  
波遙念元豐之績臣等幸承官之獲採輿言冀聞清蹕  
之音克効前驅之役庶幾洛下共償此日之心遂使周  
南無復昔人之歎

上皇帝勸進表

天人同心方嗣興於有德宗社重事可久曠於常尊雖  
懇款以樂推猶逡巡而牢避凡茲俟命安可厝躬恭惟  
皇帝陛下識照幾微誠參化育早毓神明之胄茂昭文  
武之英有開必先既獄訟謳歌之畢往惟德是輔將神  
祇祖考以咸安當承再造之休乃守一謙之益三靈交  
鬱四海疇依惟聖人所貴於因時凡天下莫先於定分  
今九廟尚虛於裸獻兩河未入於輿圖繼體守文當亟  
收於衆俊宅中圖大宜深究於遠圖倘差一日之幾孰

啟千齡之運伏望皇帝陛下俯占輿誦光御法宮莅中  
國而撫四夷履至尊而制六合雖以位為樂非堯舜之  
本心然其命維新蓋周邦之舊物瞻威在望得請為期



五百家播芳大全文粹卷二中



欽定四庫全書

集部

五百家播芳大全文粹卷

二下  
三上

詳校官編修臣謝振定

助教臣常循履勘

總校官編修臣王燕緒

校對官中書臣范 鏊

謄錄監生臣張若湘

欽定四庫全書

五百家播芳大全文粹卷二下

宋

魏齊賢

葉芬同輯

表

陳請

請加皇帝尊號表

王禹偁

内外文臣武僚具官趙某等言今月二十一日共干天

聽別以尊名奉宸翰以未俞慮精誠而不至戴天就日  
猶懸億兆之心伏閣叫闕寧避再三之瀆中賀臣等聞  
運行四時者惟天之大照臨萬國者惟日之明天不宰  
其元功而有蒼旻之號日不耀於陽德而有畏愛之名  
是以居廣大而罔辭處貞明而弗讓蓋功德著乎上而  
名號隨於下矣前王後聖茂實英聲取譬於茲其則不  
遠伏惟皇帝陛下繼天而王如日之升靜則垂堯舜之  
衣裳動則伏武湯之旄鉞明堂制禮走玉帛於萬方宣

室崇儒煥文章於三代候氣而八風從律陳詩而萬物  
由庚既理定以功成尚宵衣而旰食早以兆民愛戴羣  
后推崇率由舊章共上徽號陛下讓不得已俯而從之  
雖百姓同懽方諧歸美而一人善下終恐近名昨者法  
天道以流謙敷王言而如綍謂大道不器何假先天之  
言謂聖人無名豈須惟睿之說盡除尊號頗駭羣情臣  
等奉詔靡遑再章復請陛下過防滿假終未允俞守謙  
卦之六爻動而無悔去湯書之七號卑不可踰遂使中

外包羞軍民沮色既難移於成命乃別獻於嘉猷共傾  
天誘之哀用紀日月之德著龜協吉蠻貊同文咸願聽  
卑以期得請陛下特迂鳳藻猶避鴻名固愈振於謙光  
奈重違於人欲而況皇王顯號今古彛章上則尊列聖  
之貽謀光輝七廟下則稱庶邦之係望威服八荒凡在  
含生共觀休烈豈可執勞謙之小節廢立極之大名居  
軒昊之至尊慕巢由之獨行此臣等之所未諭也陛下  
之所不取也臣等不勝大願敢固請上尊號曰法天崇

道文武皇帝庶得將順謙冲之旨惟新徽懿之名免使  
聖朝有茲闕典跼天踏地罔敢自安碎首糜軀期於必  
遂臣等無任區區懇迫之至

請加尊號表

楊大年

文武百僚南郊大禮使具銜臣呂某等與內外馬步諸  
軍將校僧道耆壽等謹詣東上閤門再拜稽首上言曰  
臣等一昨體上天之顧謨採萬國之謳歌願增益於鴻  
名用昭彰於盛德再三之瀆已負於刺芒億兆之誠彌

堅於仄席遽頒明詔未賜允俞朝野之間啟處無措臣  
某等中謝臣等伏以字之曰道蓋出強名何言者天不  
聞讓德佛惟大覺美號有百億之殊君乃至尊徽稱兼  
三五之盛若夫聖神之冲粹高厚之儀形非可管窺寧  
容臆度出於愛戴成此勤拳是故王者懋建大中載稽  
古訓握河洛之秘紀所以畏天之明順黎獻之歡心所  
以從人之欲畧鳴謙之小節收輿誦之至公雖屈己以  
無辭誠當仁而不讓者也恭惟尊號皇帝陛下祇荷丕

構茂宣重光法人文之化成體神武之不殺惟睿作聖  
有感必通居上克明無幽不燭泣辜扇暘示仁愛於羣  
生潔菜豐盛展孝思於九廟躬帝王之能事掩載籍之  
前聞而復探妙道於域中敷至德於天下味希夷之旨  
允契混成挺高明之姿雅敦柔克極妙有玄元之理彰  
務滋邁種之勤度越古今允格上下故羣情之懇到述  
二美之形容願以大猷著於徽號而陛下固形沖挹猶  
鬱耿光莫高匪天徒懷跼躅無私者日未賜照臨況郊



祀有期方園咸在扈嘉壇而款太乙宜昭荅於神休奉  
灌鬯以見祖宗合紹隆於先志苟違遐邇之請曷副神  
祇之心臣等不勝勤勤懇懇敢固上尊號曰崇文廣武  
應道彰德聖明仁孝皇帝伏望陛下對越景靈祇膺純  
嘏特詔執事誕舉彝章以仲冬南至之辰天正上元之  
節畢禋燔於吉土覃渙汗於中區端拱穆清備物典策  
追九皇而比德與三神以交歡快華夷僊望之心成宗  
社無疆之福臣等幸甚天下幸甚謹奉表陳請以聞臣

無任

請加尊號表

楊大年

臣某等言臣等稽合人謀形容帝德願益龐鴻之號仰  
酬亭育之仁罄華夏之一心奉表章而四上仍降明詔  
未賜允俞遐邇之情隕越無措臣某等中謝臣等竊窺  
舊史載考前言夫名者實之賓蓋名不可浮於實號者  
功之表非號何以明其功天地以不宰為先猶述高明  
厚載之大德堯舜以無為而治亦著重華放勳之美稱

恭惟尊號皇帝陛下祇荷慶基誕敷駿德臨下以簡視  
民如傷舞干羽以示懷柔卑宮室而訓恭儉作事必咨  
於龜筮乃至大同考言爰及於芻蕘克章好問體玄元  
之清淨法夏后之聲身至孝烝烝所以奉先而尊祖小  
心翼翼所以君國而子民懿鑠溥將淳熙光大是以由  
中及外不謀而同咸以為陛下總妙道於無方敷明德  
於有截思範圍於休美用訴合於神永蚩蚩之氓諒亦  
知於帝力巍巍之號固上契於天心而陛下載執撝謙

未俞誠請忽邦家之大典忘祖宗之舊章況今祇事紫  
壇躬謁清廟四夷助祭知中國之有聖人羣后在庭見  
明堂之坐天子羽儀文物之震耀棗盛柅鬯之吉蠲三  
靈交歡諸神受記彤嚮昭荅戩穀具膺豈可徽懿之名  
簡畧未稱矧復雷雨渙汗肆青於九垓玉帛駿奔侍祠  
者萬國咸欲謝生於蒼昊歸美於穆清亦願覩冕旒之  
當陽觀典策之備物而陛下曲矜小節深抑大猷荷上  
帝之眷懷乃重違其成命為烝民之司牧反固拒其歡

心此臣等所以冒齊斧以上言伏蕭屏而俟報者也是  
敢不避萬死謹固上尊號曰崇文廣武應道章德聖明  
仁孝皇帝伏望俯從衆欲式昭德音干犯宸嚴必期得  
請臣無任

請皇帝御正殿表

晁无咎

徒傾葵藿之誠敢期回照未竭潢汙之滴尚或可羞矧  
變異之已消尤故常之當復中謝恭惟皇帝陛下法禹  
罪已繼文小心惟五事之罔愆於三光而何累爰以朔

旦自興重雲不用其行史前占於必蝕增修於德人莫  
覩其或虧和足致祥順宜獲助而猶謙尊自牧震虩靡  
寧雖天所以愛人君常欲制於未亂而王所以奉天道  
故當懼於無災與其戒居處飲食之安孰若擴視聽猷  
為之善豈惟過也見而更也仰是謂應以實而不以文  
南面宅尊達四聰於虞舜大庖日御綏五福於周成庶  
或聽卑終聞詔可

請皇帝御正殿表

汪彥章

乾象垂精稍拂清臺之候聖心祇戒久稽路寢之朝既  
稔沴之已銷猶曩儀之未復凡居覆幬孰不怔營恭惟  
皇帝陛下光紹祖宗丕膺厯數萃勤儉於一己濟艱難  
之百為雖功始堯帝之巍巍與天同大然心體文王之  
翼翼無日不恭比緣象緯之愆昭示國家之戒皆臣子  
素餐之過何聖人軫念之深乃遷黼座之尊退避法宮  
之正損厥奉御出於精誠然百辟晨趨宜肅乾臨之位  
四方秋請願瞻日月之光倘降次以自居則在庭之安

仰伏望陛下時回淵鑒俯徇誠祈稱警蹕以出房垂衣  
裳而當宁向明而治合禮之宜不唯安羣下之情抑以  
答昊穹之意

請太皇太后受冊表

曾文昭

朝廷盛典久抑而未施臣子微誠已殫而莫聽雖自謙  
沖之有素亦由控告之未孚敢辭冒瀆之再三所冀矜  
從之萬一中謝伏以太皇太后陛下紹承天命保佑皇  
家粵正尊名誕膺顯冊茲蓋有邦之彛制是惟列聖之



通規而況太皇太后陛下聰明並於唐虞功德高於任  
如納生靈於福壽措社稷於安彊事天治民內盡憂勤之  
念克已復禮動懷抑畏之心前詔攸同勿言徽稱退託  
不德絕迹外朝事皆貶於故常道以超於古昔頃示責  
躬之變暫停備物之儀至誠感通靡俟旋日膏澤優足  
不盈崇朝麩麥豐登禾稼茂遂家有坻京之望人無溝  
壑之虞變嘖蹙為歡聲化凶饑為樂歲是宜應民之願  
享帝之休舍已從人展寀錯事而猶逡巡自抑遜避弗

居違兆姓之心挈三神之望何以荅塞順氣慰安羣情  
伏望霽發德音勉循舊典備金石之奏御雲龍之庭極  
治世之彌文成聖王之能事一人有慶永符四海之歡  
萬壽無疆長享三牲之養臣無任

進文字表

進哲宗徽宗寶訓表

呂伯恭

聖訓淵深傳唐虞之一道信書昭著恢文武之重光載  
緝嘉謨仰勤乙覽恭以哲宗皇帝聰明睿智徽柔懿恭

饗帝饗親肅九筵而宗祀因天因地款八陛以親郊東  
回川后之流西獻虎臣之捷黔黎樂業壽俊克庭徽宗  
皇帝德冠百王道高五帝元圭載錫昭有赫之珍符隆  
萬告成垂無疆之寶鎮輪奐肇新於衢室鸞和親屈於  
儒宮禮樂交修權綱坐攬會際中興之運誕增先烈之  
光念前聖後聖之傳並垂彛教而大書特書之典敢後  
編摩上軫睿思式頒明詔紬金匱石室之秘發蘭臺虎  
觀之藏二后受之同歸於治萬物備矣皆聚此書萃圭

璧於綠文會日新於漆簡奏篇甫始執筆與榮恭惟皇  
帝陛下潤色鴻猷追成憲稽舊意於天聖酌鉅典於  
元豐巍巍成功用紀焜煌之績業業致孝式深紹復之  
思肆集品章揭為儀矩臣幸司鉛槧粗究科條丕顯丕  
承第仰羣言之首是曩是訓以貽萬世之傳臣無任

進建炎紹興詔旨表

呂伯恭

舜歷在躬大一人之聖孝堯言布下輯三紀之睿謨爰  
勒成書上干乙覽

中謝

恭以光堯壽聖太上皇帝道參

覆載功冠古今凡詔令之播敷若風雷之鼓舞辨邦誣而刊謗史前烈用光弛黨禁而錄後昆士氣如洗闢正路以來箴諫塞倖門以嚴憲章飾革輅以勞軍萬屯思奮肅芝車而耕籍九扈告豐恤刑必至於無刑急士遂收於多士揭於象魏固井井而有條颺之康衢亦洋洋而盈耳登泰和之休運啟授受之公心繼照云初增光是篤肆趣盼於宸指俾具設於攸同肇自建炎之元乃繼紹興之號旁加哀集胥協編摩言如絲而出如綸昭

華簡冊大作綱而小作紀布列章程輯致治之楷模萃  
保邦之軌轍於帝其訓與時偕行恭惟皇帝陛下明兩  
作離函三為極問龍樓之寢內聞性命之精微紬鳳檢  
之書外考典謨之渾灝逮此奏篇之御翕然發政之新  
臣服在宰司幸窺丕範初何勞於率屬第有愧於觀成  
臯陶見而知之豈容倫儻子夏得其書矣烏測淵源臣  
無任

進四明尊堯集表

陳瑩中

臣瓘言臣六月初五日准通判牒准編修政典局牒奉  
聖旨取臣所著尊堯集臣依稟聖旨不敢違滯緣臣著  
撰此集未經奏御令具狀申編修典局乞為繳進合於  
御前開拆者臣竊以畎畝愛君精誠雖至芻蕘議政迂  
濶難行葵向不習而常傾片陋敢期於得獻獨因睿斷  
許貢危衷中謝伏念臣糞土下材犬馬賤質數罪固多  
於擢髮舍生無意於兼魚初欲糜捐終難緘默因續前  
言之緒聊輸垂絕之忠非敢有善善惡惡之詞但欲明

尊尊卑卑之義此螻蟻所能知也在縉紳安可邈然八十卷之私書奪此與彼十九年之懿績可從而違陛下於繼述之初首辨明於茲事微臣持將順之志在流竄而靡忘鋪張痛詆之言編類厚誣之語初謂熙寧之輔不媿有商之臣於成湯敢肆厥欺疑安石有所弗忍及究觀於懟筆始粗見其游辭因思大典之久誣益願忘軀而往訴合浦十論申舊疏之餘言四明八門撮其要於一序實欲彰火德之盛不敢畏王氏之強寧碎首於



邦誅忍設心於國是彼效尤於往轍亦苟逞於陳編難  
以縷窺畧舉綱要謂藝祖濫誅無罪謂真宗矯誣上天  
訕薄裕陵攘奪先美以託訓為箱口之術以歸過為自  
譽之媒但矜詆訾之極工罔顧威靈之如在幾乎罵矣  
豈不痛哉讀其書寧忍終篇稽其文可為流涕代言之  
筆盡目其徒為儒宗首善之宮肇塑其形為坐像禮官  
無禮而行諂史書獻佞而請觀光乎仲尼乃王雱聖父  
之贊比諸孟子實雱等輕君之情彼哀周之僻王棄真

儒之將聖當時不得配太廟之饗後人所以廣上下之  
祠今比安石為欽王之臣則方神考為何代之主又況  
一人幸學列辟班隨至尊拜伏於爐前故臣驕居而坐  
視百官氣鬱多士心寒自有華夏以來無有悖倒之禮  
神考之再相安石始終不過乎九年安石之屏迹金陵  
棄置不召者十載八字威加於鄧綰萬幾獨運於元豐  
豈可以善述之時忽崇此不遜之像因壞先朝三舍之  
法遂費今日千倍之財人材之可擢不殊國用之添費

徒廣腹吾民之膏血增彼像之精神美成其私怨集於  
國陸贄設枝顛之喻承業以財盡為憂忠哉古人愛君  
之誠異乎今日養士之意入況臨川之所學不以春秋  
為可行謂天子有北面之儀謂君臣有迭賓之禮禮儀  
如彼名分若何此乃哀世侮君之非豈是先王訪道之  
法贛川舊學紀刊於四紀之前辟水新廡像成於一壻  
之手唱如聲召應若響隨使王氏浸至於強梁乃元祐  
助發其氣焰昔宣仁權同之際謂介甫節行甚高宜贈

崇官仍加美謚司馬光書之於簡呂公著行之於朝不以稽弊為心徒發鎮浮之議負安石者重加黜責議神考者畧不誰何遂至於枝蔓而難圖豈非由偏助之太過雖當時未見誣史而先朝自有聖批恬不奉行養成乖悖蒙蔽裕陵之衆美眩耀鍾山之一書四輔之行謀畫本生於日錄三衛之設規模初定於新經密密乎鄧蹇之安排草草乎京摠之傳授考其音聲則箎唱而壎和譬諸手足則左弱而右強凝為冰山烈若原火愚公老

矣益堅平險之心精衛眇然未捨填波之願沒而後已志不可渝望雖隔於戴盆夢不忘於馳闕丹誠上格天語遙詢要觀尊主之恭緩議奸時之罪淵冰在念梟磔寧逃恭惟皇帝陛下天大普容日明徧照覽熙豐記動之史倣虞夏採詩之官咨輿議於多方證私書之百毀舜纘堯緒孜孜乎善繼之勤武廣文教斤斤乎丕承之美茲所謂一人有慶可以得萬國之歡凡有識知孰不將順天地尊卑之已定手足上下之宜分孔志在乎春

秋漢律嚴於名分戴上者皆知此義尊堯者豈獨臣書  
燕馬以市骨為先鬻驥者必將來矣鄭校決防川之壅  
有舌者其忍默乎臣命可危衆口難遏伏望陛下念臣  
後志於享上憫臣積禍於敢言以尺朽之廢材貢一得  
之愚慮言多妄發事則有稽宣宗當紹憲之時寧容德  
裕之奪語武帝以迷景為事忍視馬遷之短辭父子至  
情古今一揆不懲謗史之罪則何以謝過於宗廟不毀  
坐像之悖則何以示順於華夷國是方強勢難遽改大

器至重要在深思庶乎苗莠之分始於冠履之辨至美成於剛健大患生乎因循儒宗數人自是一家之說聖主獨斷乃為我宋之休天心篤愛之甚明人情企想而有待解神考在天之怒成聖主奉先之仁克果斷於蔡方人將大覺善揚光於堯績上可無為於一嘖一笑之中成允文允武之業臣將獻駿惠太平之頌豈特進狂簡不裁之書胸臆無奇但盡恭於文字筋骸已憊當致命於君親仰酬再造之恩退聽一成之議闔門待盡殞

首知歸臣無任

進郊祀慶成詩表

蘇子瞻

親奠璧琮始見天地兼陳祖宗六廟之典參用漢唐三代之文夷夏來同人神允答中謝恭惟皇帝陛下聿追來孝對越在天外修神考之文章內服文母之慈儉四方觀禮百辟宅心雪止風恬驗神祇之來享雲黃歲美知豐凶之在人臣以藝文入侍帷幄考事而知天意陳詩以達民言雖無足觀亦各其志



進郊祀慶成詩表

蘇子由

莫大之儀成於一日無窮之澤施及四方歡聲所同和  
氣必應伏惟皇帝陛下奉烈祖之成憲蹈文母之訓言  
臨御七年恪守一德人服孝慈之化物知仁厚之心神  
祇降休麥禾薦熟長日既至舊章不忘以為再享明堂  
未暇園丘之大祀躬詣皇地久稽先帝之遺言惕然不  
寧述而非作是用修合祭之舊補不講之文人情所安  
神意昭答況復肆眚之令一寬於冥頑已責之恩大弛

於纍紲施仁於不報之地獲福於無求之中每侍清光  
畧聞大旨勉強吟咏形容盛明愧周頌二后之精深之  
唐賦三禮之廣麗圖寫天日自知難成間雜風謠或有  
可取

進承天節頌表

楊文公

臣某言運偶承平節臨載誕凡叨食於周粟盡願祝於  
堯年臣某中謝臣本自諸生偶干寸祿受兩朝之顧盼  
無馮唐不遇之嗟閱四部之圖書有黃香未見之恥雖

研精而強力終昧道以迷途而千載休辰萬邦大慶充  
庭任土慙非玉帛之云巢閣舞庭豈在飛走之末是敢  
罄竭庸鄙撰成天節頌一首獻於闕下吉甫作頌愧無  
清風之稱東方上書或經乙夜之覽

進御筆表

張芸叟

臣等言昨奉勅編修神宗皇帝御筆文字者王者出言  
而為令風動於四方聖人肆筆而成書可傳於後世中  
謝恭以神宗皇帝勵精為治十有九年方在憂勤未遑

暇逸事無大小躬自指揮其至仁厚惠如風霆雨露固已動潤於堪輿其睿謀格言為法度憲章豈止奉行於省寺皇帝陛下善述其志太皇太后陛下寶之以慈永惟墜典之畢興而況本朝之故事俾修御筆首飭有司惟尚書治總六曹事包九棘紛然案牘隱若丘山或收於斷簡之餘或得於殘編之末雲章炳煥手澤溫純觀之不覺動神讀之可為流涕其間理財用則先崇於節儉讞刑罰則首務於平反簡拔人才恢通邊圉事事可

以為法孳孳莫匪在公順考而行為國何有又何必  
審周之道乃可迓衡誦堯之言方為稽古臣等成書不  
敏授簡非工徒殫夙夜之勤何補丹青之治其事目凡  
一十有八件分上中下三冊謹具表上進

進稽古編表

司馬溫公

臣某言竊以九州四海一日萬幾將察知民物之性情  
蓋布在文武之方策雖歷年多而舉其大要則用力少  
而見夫全功恭以皇帝陛下富有春秋弭寧方夏念終

始典於學於緝熙殫厥心延登老成親近勸講發論語  
章句探經藝於同歸誦寶訓丁寧憲祖宗之不易本有  
如是實惟濫觴惟稽古堯舜之舊章惟信史春秋之成  
法高山可仰覆轍在前其興亡在知人其成敗在立政  
或當艱難之運而不能師用賢智或有惻隱之意而無  
以照知忠邪載籍之編患乎太漫監觀之主力不暇遑  
敢用芟夷略存體要由三晉開國迄於顯德之末造臣  
既具之於厯年圖自六合為宋接乎熙寧之始元臣又

著之於百官表乃若威烈丁丑而上伏羲書契己未對  
越神人可用龜鏡悉從論纂皆有依憑總而成書為稽  
古錄二十卷因仍書局繕寫奏篇茲冒昧以上陳助聰  
明之遠覽中謝恭惟太皇太后陛下定九鼎以守天下  
之公器乘六龍以御天下之正權思齊之功啟佑聖學  
過物之濟燕及宗祧至於法弊於涼而改為官非其人  
而變置御戎之策上下措國之勢安危據舊以鑒新去  
彼而取此陶成萬化簡在兩宮七廟垂無疆之休徵臣

與不朽之業干冒宸衷臣無任

進先公文定公文集表

胡明仲

臣某言臣弟太常丞臣寧輪對奏事伏蒙聖慈宣問乃  
父既解釋春秋尚當有他論著其具以進者宸衷尚舊  
故老形思訓釋典文夙簡淵深之記遺餘篇翰更蒙清  
燕之求臣某中謝伏念先臣早捐塵事志希任道謀不  
為身心遠地偏寄陶廬於三徑人憂已樂甘顏巷於一  
瓢吟咏情性而無雕虫篆刻之為交際往來而乏竿牘



苞苴之智中經俶擾多所散亡晚獲奠居僅成編簡精  
忠皎皎每提撥亂之綱莊語諄諄多闡濟時之用進則  
傾輸於君父退猶闕說於公卿壯懷投老而益堅弱齒  
抱痾而彌篤自期有補終其一伸丘木成陰雖鬱春秋  
之志囊書奏御何殊旦暮之逢此蓋伏遇皇帝陛下典  
學裕身崇儒化俗華袞豈惟於一字緇衣不聞於十年  
乃因仲息之對揚錫以溫顏之清問斯文不墜多士流傳  
臣謹以校定舛訛分成門次爰從傳置進備覽觀函劍有

光既徹斗牛之象浦珠無類合供冕旒之須

進家集表

王豐甫

竊以在治之金以自躍而為恥韞匱之玉必待賈而乃  
珍念父書之久藏當盛德而難隱中謝恭惟皇帝陛下

英猷天啟睿學日熙制規二帝之摹言合六經之訓握  
樞立極纂承禹績之嘉肆筆成書丕紹堯章之煥重念  
先臣某少緣家學早中甲科校天祿之文才稱金馬視  
淮南之草名在玉堂作新兩漢之文章潤色三朝之誥

命世有儒宗之譽史多天獎之辭傳誦一時豈特語言之妙協成大事固多翰墨之功晚受知於裕陵久登庸於宰路當廊廟謨謀之暇猶國家論議之兼畢罄精忠仰贊格天之業迨膺顧託獨先定策之言暨陷驩兜之誣阻奏東方之牘方陛下丕揚先烈追念舊勞辨銷骨之讒既昭前事覽凌雲之作恨不同時悲哀平日之遺文益愴他年之榮遇故金滕之策不及於生前上茂陵之書徒嗟於沒後

進貢表

賀皇帝登極進絹表

李成季

大人繼明神明協相四方來賀玉帛交馳仰罄歡心畢  
輸邦物臣猥叨符竹阻覲帝闈敢陳在筐之儀少助充  
庭之實

賀皇帝登極進銀表

許仲啟

禹若舜初率百官而班瑞漢因周舊膺萬國之貢珍前  
件物沙鑠本同范鎔自貴甫慶執中之命敢修享上之

儀明用黃離起鳳翼龍鱗之願儉成白賁殊袞號麟趾  
之誇

進銀表

趙德莊

雷風鼓舞方丕冒於海隅玉帛會同盍將歸於宰旅前  
件物名標貢品事列獻程受祿於天雖無倫而富有朝  
宗於海抑善下以成能

進銀表

負宸而輯五瑞共惟帝臣考圖以別九州敢執執壤奠前

件物用參中幣出自餘財岳貢川珍雖愧備陳之盛雲  
行雨施少裨慶施之效

聖節進絹表

歐陽永叔

重熙纂厯載誕啟辰正守陳儀允昭於嘉會庶邦修貢  
咸効於駿奔前件絹三壤所宜九賦攸出備諸宰旅實  
織筐以非工竊比野人得美芹而是獻

聖節進銀表

曾子固

自天生德與世為歸屬當載育之期敢薦無疆之祚前

件物輒備土毛之末用參篚貢之餘遠守蠻荆莫預造  
庭之會仰懷象魏但祈難老之祥

聖節進絹表

元命在躬方啟龍興之運洪圖集祉爰開鳳降之祥前  
件物敢薦服官用參庭實緣嬪貢之薄獻祝難老之殊  
祥

聖節進絹表

石敏若

流虹飛電乾坤薦祉於一人就日望雲玉帛交馳於萬

國載輸品物仰控丹誠前件物民力之餘邦財所出歡  
聲震海旅實充庭雖堯仁如天罄所產莫酬洪造虎拜  
稽首欲萬年歸美吾君豈臣等之私言乃太平之輿議  
康衢擊壤歌如山如阜之詩鳴佩稱觴望非露非烟之  
閣

進瑞木嘉禾表

崔德符

兩儀敷佑諸物効祥於昭至治之隆丕顯太平之應

中

謝臣聞古者君臣合德夷夏交歡仁澤滂流和氣充塞



而靈芝間出瑞木時生固已被之管絃渙乎圖史未有  
連柯並秀擢百尺之名材接畛叢生過九莖之成數泛  
觀今古曼絕見聞此蓋伏遇皇帝陛下子視羣黎天臨  
萬國孝追先志功格上靈故得七廟儲休百神薦祉曲  
形庶類薦降珍符矧其一發於千春之鄉一產乎感仁  
之里揭示歷年之永誕彰神化之孚而臣職在承宣親  
觀奇勝追元豐之故事請播於樂歌紀大觀之新書願  
垂乎信史今畫到圖子一面謹隨表上進以聞

進琴表

崔德符

性情之正有待於節文律呂之微必藏於度數非大巧孰能制器非至聰無以審音退省僭尤伏深震懼

中謝

竊以在昔帝王之盛德躬御琴瑟之正音大孝因心聞有思親之操至仁軫慮傳諸解慍之歌至於禹服貢嶧陽之材周樂備雲和之奏薦於郊廟以格鬼神蓋必興禮樂以致太平故能垂衣裳而治天下恭惟皇帝陛下天開上智神授成能作樂教和已形於海縣以聲為律

一出於睿謨當聖人有作之時實衆技呈才之日而臣  
素耽雅道自製孤桐雖血指汗顏多慙於妙手而龍池  
鳳唳竊比於良工所有斲到琴一面謹隨表上進以聞

進歲貢綾并藥物表

邵公濟

一人有慶寰宇宙以來王萬國輸忠任土地以充賦禮  
成貢服意比獻芹中謝景運應期洪基繼聖辨神農之  
草木垂黃帝之衣裳雖四海頌堯獨先於儉德而九州  
貢禹自至於盛儀惟此南充稱於東蜀蚕叢善俗工勤

秦國之綾謝女仙山地產神州之藥仰塵府藏謹贄篚  
箱物無損於絲毫心共傾於葵藿

進馬表

四方來賀共申善禱之私萬壽稱觴當有備物為稱念  
此充庭之實無如在廐之良前件馬質妙權奇氣稟神  
駿暫御省方之駕行聞還蹕之音

五百家播芳大全文粹卷二下